



## Kryzdubel-Clique

1.

Will hite-n-aine bildet si,  
Muess kryzworträtsle-n-är.  
Kan-er dä Quatsch uflöse gly  
So maint er, was er wär!  
In jedem Blettli schwarz uf wyss  
Findsch hite gwis e sone Kryzwortgschyss!

2.

D'r Bränzli in Civil an d'Gränz  
Sich ohni Pass getraut;  
Do sait d'r Zöllner: mach kai Pflänz;  
Und bums — der Bränzli haut!  
Doch d'Uniform macht no kai Ma,  
Me seht em ainewäg der „Jüngling“ a!

3.

Zwai Töfftöff, fahre si dur d'Stross;  
D'r Schugger het e Blick  
Und fluecht scho, d'r Verkehr isch z'gross,  
Här mit em Sens unique!  
O Beppi, isch es Dir denn schnurz,  
Wenn d'tanze muesch no däm Polypef . . . !

4.

In Sache Sädheli Haimetschutz  
Berote si dä Schild,  
Si schnörre dri und s'isch nit nutz,  
Me seht's do an däm Bild;  
Drei schwarzi Gläggs — s'merkt's jedes Kind:  
S'isch Conterfei vo some Zwätschgegrind.

5.

Der ACV si Gäld versaut,  
Die Querköpf wänn's so ha;  
's Gäld wird verkitscht, verkaibt, verbaut  
Si zahle doch nit dra!  
Der Louvre wird in rot verhetzt!  
„Proletenarrehus“ haist d'Firma jetzt!

6.

An Größewahn lid't au d'r Bell  
Drum kauft er 's Metropol,  
Er maint, si Baiz syg uf d'r Stell  
An jedem Obe voll.  
Doch well sie sich so guet rentiert,  
Goht Bude zue — me sait — „s'werd renoviert“!  
(à la Singer.)

7.

Dä Film vo Kraft und Scheenheit — bref —  
Het ufregt d'Polizei,  
„E blutte Kerper“ sait der Chef,  
„Das isch e Sauerei!  
Der gwehnlig Mensch brucht das nit z'gseh —  
Fir das hänn mir e Chambre séparée“!

8.

D'Usstellig vo d'r Bäckerei,  
Die isch ganz intressant;  
Maschine gseht me-n-allerlei,  
's Brot macht me nimm vo Hand.  
Doch zaigt is dert d'r Meischterstand,  
Wie är no knätte ka und zwor vo Hand!

9.

D'r Hundebann, er isch verby  
Und d' Viecher sin jetzt frei;  
Doch soll im Großrot d' Tollwuet sy  
An Schnurepflutterei!  
Oh gäb's doch au, jahrzäntelang,  
Fir d' Großröt Schnurebann und Mulchorbzwangl!